

## MEMORANDWM CYDSYNIAD DEDDFWRIAETHOL ATODOL (MEMORANDWM RHIF 4)

### Y Bil Pysgodfeydd

1. Gosodir y Memorandwm Cydsyniad Deddfwriaethol hwn o dan Reol Sefydlog 29.2. Mae Rheol Sefydlog 29 yn rhagnodi bod rhaid gosod memorandwm cydsyniad deddfwriaethol, ac y ceir cyflwyno cynnig cydsyniad deddfwriaethol, gerbron Senedd Cymru os yw Bil Seneddol y DU yn gwneud darpariaeth mewn perthynas â Chymru at unrhyw ddiben sydd o fewn, neu sy'n addasu cymhwysedd deddfwriaethol Senedd Cymru.
2. Yn dilyn cwblhau camau craffu Tŷ'r Arglwyddi, cyflwynwyd y Bil Pysgodfeydd ("y Bil") yn Nhŷ'r Cyffredin ar 2 Gorffennaf 2020. Cynhaliwyd Ail Ddarlleniad ar 1 Medi a chwblhawyd proses Pwyllgorau Tŷ'r Cyffredin ar 15 Medi. Mae'r fersiwn ddiweddaraf o'r Bil ar gael yma:

[Dogfrennau'r Bil - Bil Pysgodfeydd 2019-21 - Senedd y DU \(y cam ar ôl Pwyllgorau'r Tŷ'r Cyffredin\)](#)

### Amcan y Polisi

3. Mae Llywodraeth y DU wedi datgan y bydd y Bil yn darparu'r fframwaith cyfreithiol i'r DU weithredu fel gwladwriaeth arfordirol annibynnol o dan Gonfensiwn y Cenhedloedd Unedig ar Gyfraith y Môr 1982 (UNCLOS) ar ôl i'r DU adael yr Undeb Ewropeaidd a'r Polisi Pysgodfeydd Cyffredin.

### Crynodeb o'r Bil

4. Noddir y Bil gan Adran yr Amgylchedd, Bwyd a Materion Gwledig.
5. Mae'r Bil yn darparu ar gyfer:
  - amcanion polisi mewn perthynas â physgodfeydd, pysgota a dyframaethu, datganiadau pysgodfeydd a chynlluniau rheoli pysgodfeydd;
  - mynediad i bysgodfeydd Prydain;
  - trwyddedu cychod pysgota;
  - pennu a dyrannu cyfleoedd pysgota;
  - creu cynlluniau ar gyfer codi tâl am ddal pysgod môr heb yr awdurdod i wneud hynny;
  - grantiau ar gyfer pysgota, dyframaethu neu gadwraeth forol;
  - adennill costau sy'n gysylltiedig ag arfer swyddogaethau cyhoeddus sy'n ymwneud â physgod neu bysgota;
  - rhoi pwerau i wneud darpariaethau pellach sy'n gysylltiedig â physgodfeydd, dyframaethu neu anifeiliaid y dŵr;
  - gwneud darpariaeth ar gyfer is-ddeddfau a gorchmynion mewn perthynas â chamddefnyddio pysgodfeydd môr; ac at ddibenion cysylltiedig.

## **Diweddariad ar y sefyllfa ers cyhoeddi'r trydydd Memorandwm Cydsyniad Deddfwriaethol**

6. Mae Llywodraeth Cymru wedi gosod y Memoranda Cydsyniad Deddfwriaethol canlynol:
  - Memorandwm Cydsyniad Deddfwriaethol ar 12 Chwefror 2020, yn seiliedig ar y Bil fel y'i cyflwynwyd gerbron Senedd y DU ar 29 Ionawr 2020.
  - Gosodwyd Memorandwm Cydsyniad Deddfwriaethol Atodol (Memorandwm Rhif 2) ar 8 Gorffennaf, yn dilyn diwygiadau a wnaed i'r Bil yn ystod cam craffu Tŷ'r Arglwyddi.
  - Gosodwyd Memorandwm Cydsyniad Deddfwriaethol Atodol (Memorandwm Rhif 3) ar 16 Medi, yn dilyn cyflwyno diwygiadau i'r Bil y bydd Pwyllgor Tŷ'r Cyffredin yn craffu arnynt.
7. Mae'r Memorandwm Cydsyniad Deddfwriaethol Atodol (Memorandwm Rhif 4) yn cwblhau'r pecyn o'r holl ddiwygiadau a waned i'r Bil hyd yma. Ni chaiff rhagor o ddiwygiadau eu gwneud cyn y ddadl ar y Cynnig Cydsyniad Deddfwriaethol ar 6 Hydref.
8. Mae Llywodraeth Cymru yn parhau'n gefnogol i'r Bil, wrth iddo barhau ar ei daith drwy Senedd y DU. Mae Cymal 45 yn sicrhau estyniad sylweddol i gymhwysedd deddfwriaethol y Senedd mewn perthynas â physgota, pysgodfeydd a materion sy'n gysylltiedig ag iechyd pysgod, y tu hwnt i Gymru i barth Cymru, ac mae'n alinio cymhwysedd y Senedd â phwerau gweithredol Gweinidogion Cymru.
9. Bydd Llywodraeth Cymru yn ystyried y pwerau ar gyfer Gweinidogion Cymru yn y Bil hwn yn fesur dros dro, nes bod Bil Pysgodfeydd ar gyfer Cymru yn cael ei gyflwyno gerbron y Senedd.

### **Diwygiadau i'w nodi ers cyhoeddi'r Memorandwm Cydsyniad Deddfwriaethol Atodol (Memorandwm Rhif 3) y mae angen cydsyniad ar eu cyfer.**

10. Mae cam Pwyllgor Tŷ'r Cyffredin wedi dod i ben a chytunwyd ar y diwygiadau canlynol sy'n ymwneud â chymhwysedd deddfwriaethol Senedd Cymru ac sydd wedi'u hymgorffori o fewn y Bil: 1, 2, 5 – 9, 22 – 23, 27, 29 - 35, 48 – 50, 52, 53, 55 a chymalau newydd 1, 57, 59 – 60 ac atodlen 1 newydd. Mae Memorandwm Cydsyniad Deddfwriaethol Atodol (rhif 3) yn nodi'n safbwynt ynghylch y diwygiadau hyn a gallaf gadarnhau unwaith eto ein bod o blaid eu cynnwys yn y Bil.
11. Cafodd diwygiadau'r Llywodraeth 144, 145 ac 146 eu gwneud hefyd yng ngham Pwyllgor Tŷ'r Cyffredin ond ni wnaeth Memorandwm Cydsyniad Deddfwriaethol Atodol (Memorandwm rhif 3) ymdrin â nhw oherwydd y dyddiad y cawsant eu cyflwyno.
12. Mae rhifau'r cymalau isod yn ymwneud â fersiwn ddiweddarar Bil;

13. Mae Cymal 39 (Diwygiad 144) yn sicrhau bod cwmpas pwerau'r Ysgrifennydd Gwladol i wneud rheoliadau yng nghymalau 38 a 40 yn eithrio darpariaeth sydd o fewn cymhwysedd deddfwriaethol Senedd Cymru gyda chydysniad Gweinidog y Goron.
14. Mae Cymal 49 (Diwygiad 146) yn mewnosod yn y Bil ddiffiniad o Weinidog y Goron.
15. Mae Atodlen 8 (Diwygiad 146) yn galluogi Gweinidogion Cymru, gyda chydysniad yr Ysgrifennydd Gwladol, i gynnwys yn y rheoliadau o dan baragraff 6 neu 8 (o'r Atodlen) ddarpariaeth sydd o fewn cymhwysedd deddfwriaethol Senedd Cymru os yw Gweinidog y Goron wedi rhoi cydsyniad.
16. Cafodd tri diwygiad a wnaed i'r Bil yng ngham Adroddiad Tŷ'r Arglwyddi eu hepgor yn anfwriadol o'r Memorandwm Cydsyniad Deddfwriaethol Atodol (Memorandwm rhif 2). Fe'u cynhwysir felly yn y fan hon. Mae rhifau'r cymalau yn cyfeirio at rifau cyfredol y Bil:
17. Cymal 2 – gwnaed diwygiad er mwyn cynnwys is-adran (2) er mwyn ei gwneud yn ofynnol i ddatganiad cyd-bysgodfeydd nodi polisiâu'r awdurdodau polisi pysgodfeydd sy'n ymwneud â dosbarthu cwotâu daliad ac ymdrech i'w defnyddio gan gyhochod pysgota.
18. Cymal 23 – gwnaed diwygiad arall yng ngham Adroddiad Tŷ'r Arglwyddi sy'n mewnosod is-adran 11 yng nghymal 23. Mae'r diwygiad yn esbonio ystyr cyfleoedd pysgota o dan y cymal mewn perthynas â deddfwriaeth uniongyrchol yr UE a ddargedwir.
19. Cymal 26 – gwnaed diwygiad er mwyn cynnwys is-adran (2) sy'n cymhwyso rheolau mewn deddfwriaeth uniongyrchol yr UE a ddargedwir ynghylch pryd i gyfrif a pheidio â chyfrif dalfeydd yn erbyn cwotâu at ddiben y ddyletswydd yn is-adran 11 o'r Cymal hwn, er mwyn sicrhau bod y rheolau hyn yn cael eu cymhwyso'n gyson.
20. Mae paragraff 19 y Memorandwm Cydsyniad Deddfwriaethol Atodol (Memorandwm rhif 2) yn ymwneud ag Atodlen 10 (Rheoliad Polisi Pysgodfeydd Cyffredin: diwygiadau mân a chanlyniadol) sy'n cynnwys diwygiadau a wnaed i gyfraith yr UE a ddargedwir mewn perthynas â hyblygrwydd wrth ymdrin â chwotâu, y mae'r diwygiad i gymal 26 yn ymwneud ag ef.
21. Cymal 52 – yn nhrydydd darlleniad Tŷ'r Arglwyddi, cafodd y darpariaethau teitl byr eu diwygio i gynnwys diwygiad braint. Mae hyn bellach wedi'i ddileu ar ôl i Bwyllgor Tŷ'r Cyffredin ei ystyried.

## **Safbwynt Llywodraeth Cymru ar y diwygiadau a wnaed i'r Bil**

22. Mae Llywodraeth Cymru o blaid y diwygiadau a wnaed yng ngham Pwyllgor Tŷ'r Cyffredin a ddisgrifir uchod ac a welir yn y Memorandwm Cydsyniad Deddfwriaethol Atodol (Memorandwm rhif 3).
23. Llywodraeth Cymru ofynnodd am y diwygiadau i gymalau 39 a 49 ac atodlen 8, a wnaed yng ngham Pwyllgor Tŷ'r Cyffredin, i sicrhau bod cwmpas pwerau Gweinidogion Cymru o dan Atodlen 8 yn cyd-fynd â chymhwysedd Senedd Cymru.
24. Cefnogir y diwygiad i gymal 2 a wnaed yng ngham Adroddiad Tŷ'r Arglwyddi, i gynnwys y gofyniad i nodi'r polisïau sy'n ymwneud â dosbarthu cwotâu. Disgwyliwn i Ddatganiad y Cydbysgodfeydd nodi'r polisïau i'r perwyl hwn.
25. Mae'r diwygiad i gymal 23 a wnaed yng ngham Adroddiad Tŷ'r Arglwyddi, yn esbonio ystyr cyfleoedd pysgota o dan y cymal.
26. Mae'r diwygiad i gymal 26 a wnaed yng ngham Adroddiad Tŷ'r Arglwyddi, yn angenrheidiol er sicrhau bod y llyfr statud yn ymarferol ar ddiwedd y Cyfnod Gweithredu.
27. Mae'r diwygiadau braint i gymal 52 yn adlewyrchu'r gweithdrefnau safonol ar gyfer Biliau sy'n cynnwys darpariaeth codi ffioedd sy'n dechrau yn Nhŷ'r Arglwyddi. Mewn osodir y darpariaethau hyn gan Dŷ'r Arglwyddi a chant eu dileu gan Dŷ'r Cyffredin trwy gonfensiwn.

## **Goblygiadau ariannol**

28. Nid oes unrhyw oblygiadau ariannol uniongyrchol i Gymru o ganlyniad i'r ffaith bod y darpariaethau hyn yn cael eu cyflwyno yn y Bil hwn.

## **Casgliad**

29. Rydym yn parhau i fod wedi ymrwymo i ddull DU gyfan ar gyfer creu'r Fframwaith Pysgodfeydd, a dim ond drwy Bil ar gyfer y DU y gellir gwneud hynny. O ran y pwerau yn y Bil nad ydynt yn rhan o'r fframwaith, mae'n bwysig y gall gweinidogion Cymru weithredu mewn modd cyflym a phenderfynol yng Nghymru, nes ein bod yn gallu cyflwyno Bil cynhwysfawr ar gyfer Pysgodfeydd Cymru.
30. Rydym o blaid yr holl ddiwygiadau a wnaed i'r Bil, fel y'u disgrifiwyd uchod.
31. Mae'r Cynnig Cydsyniad Deddfwriaethol wedi'i osod, cyn dadl y cyfarfod llawn, gan argymhell bod Senedd Cymru yn rhoi ei chydsyniad i wneud y Bil.

**Lesley Griffiths AS/MS**  
**Gweinidog yr Amgylchedd, Ynni a Materion Gwledig**  
**Hydref 2020**